

Tin situacionnan peligroso na Aruba cu no necesariamente ta na cas



ORANJESTAD (AAN): Roque Dirksz director di GKMB durante un conferencia di prensa riba e campaña

di limpieza a hiba palabra caminda cu el a splica cu ta bon pa splica e comunidad riba obhetonan cu nan ta concentra

riba dje. Tin diferente cos cu ta importante.

Tabata tin expertonan di PAHO na Aruba tambe y a

haci investigacion riba e tipo di sanguranan cu tin na Aruba. Tin situacionnan peligroso na Aruba cu no necesariamente ta na cas. A constata cu e sangura di Dengue a adapta su mes na e situacion na Aruba y a resulta cu no ta solamente limpi so e por reproduci. A constata cu e ta haci esaki den awa sushi tambe.

Esaki ta nifica cu den e temporada di yobida, e ta bira un situacion hopi peligroso aki na Aruba. E ora no ta papia di obhetonan so, pero plasnan di awa sushi cu a keda para pa basta tempo. "E ta bay duna nos hopi dolor di cabes," Dirksz a comenta.

Na e areanan GKMB lo ta na e tentnan pa duna flyer cu informacion di con por evita criaderonan. Tin obhetonan cu GKMB kier bo deshaci di nan den bo cura. Tire ta un di e puntonan importante. Elimina y benta e tirenan afo. Roque Dirksz a splica cu frigidaire bieu cu ta grandi y no por benta afor awor ta bo chens pa deshaci di esaki

ora e campaña di limpieza yega den bo bario. E awa blanco y limpi cu cambia color tambe ta peliger awor pa e sangura di dengue. Pero tambe ta papia di drumnan, y si no kier tira nan afo, tira kerosin den dje. E no ta causa ningun daño na mata. Dirksz a splica cu por yama oficina di GKMB of yega caminda e campaña ta on cu bakinan pa haya informacion. Tambe por bay na cas den e bario unda cu e accion ta tumando luga.

El a splica cu na Aruba tin mas cu 40 mil adres y GKMB tin e tarea pa controla tur e casnan. No ta tur ora ta logra repiti e control, pasobra no ta tur ora tin hende na cas, pero lo bolbe semper riba un otro fecha. Y control extra ta worde teni na e casnan unda na mas cu un ocasion a topa cu criaderonan.

Tambe tin un mapa unda cu tur awanan ta keda para y e funcionarionan lo tira control special den e areanan ey unabes cu tin yobida.